

## ❖ Y DOETHION

(ar y gân-gân 'Troyte')

Roedd rhywrai yn dweud mai ffôl oeddem ni  
Yn dod o'r pellteroedd i'th geisio Di;  
Ond mentro a wnaethom dros diroedd maith,  
Nadolig y Brenin oedd pen y daith.

Dywedent mai ffôl oedd syllu i'r nen  
A dilyn y seren a befriai uwchben,  
Ond rhaid ydoedd dilyn drwy'r siwrnai hir,  
Roedd golau y Seren mor glir, mor glir.

'Mor araf,' medd rhai, 'yw'r camelod hyn,  
Ni'ch cludant ymhell tu arall i'r bryn.'  
Ni wyddent mai araf bob amser yw  
Y daith sy'n dwyn doethion at drysor Duw.

Mae rhywrai'n synnu'n fawr inni ddod  
O'n plasau moethus at lety di-nod,  
Mae'n wir mai hardd yw ein plasau i ni,  
Ond coron pob harddwch mwy fyddi Di.

O! cymer ein rhoddion, aur, thus a myrr,  
Cans eiddot bellach bob gwawrddydd a dyr,  
Yfory rhaid dweud wrth bawb yn y byd  
Mai Ti yw'r Doethaf o'r doethion i gyd.

**W. Rhys Nicholas**